

**Erich Bolinius**

[www.erichbolinius.de](http://www.erichbolinius.de)

[Erich.Bolinus@t-online.de](mailto:Erich.Bolinus@t-online.de)

## **Bericht über den BSV Kickers Emden - Sendung „Flutlicht“ auf Radio Ostfriesland**

**Donnerstag, 24.5.2012 18.05 Uhr** auf 94.0 bzw. 87,7

Leev Toehörers,

mien lesd Bericht in disse Sendung hebb ik vör 14 Daag geven. Wat is in disse Tied 'n Bült up de Foetballplatzen in Düütskland passeert! Dor is dat Skandaalspöl tüsken Hertha BSC Berlin un Fortuna Düsseldorf dat 2:2 utgahn is, nadem dat Spöl faaker unnerbroken worden muss, wall de Fans sük as Verrückten verholten hebben. Dat Hertha BSC beandraagt hett, dat dat Spöl noch maal dörföhrt worden muss, kann ik verstahn. De Naspöltied harr mit Foetball nix mehr toe doen.

Un dann dat Spöl Bayern München tegen Chelsea, dat de Bayern na dat Elfmetersketen verloren hebben. Ik bün ansük keen Bayernfan. Aber dat hebben se neet verdeent! Dat so 'n engelske Mannskupp, de blot achtern drin steiht, ok noch winnt, dat is ja bold neet toe verstahn. Man so brutaal kann Foetball wesen. Hopen wi blot, dat de Bayernspölers bit de Europameisterskupp weer de Kopp freei hebben.

Man nu toe Kickers Emden. Vör 14 Daag hebb ik van disse Stee ut seggt, dat Kickers sük doch maal in Holland umsehn sull, of man neet 'n Fründskuppsspöl tegen Groningen, Heerenveen of Veendam maken kann. Un, wat hör ik. An 7. Juli kummt de FC Groningen na Emden, dat hett de hollandske Vereen, de in de Ehrendivision spölt, up sien Internetsied al dorstellt. Präsident **Günther Kunz** hett tegenover 'n Bladdjeschriever seggt, dat dat noch neet heel klaar is. He mutt dat noch mit sien Vörstandskollegen ofproten. Man ik löv, wat ik so hört hebb, dat dat klappt. Dorup könt sük de Toekiekers un de Spölers, de van Trainer **Yasin Turan** an 27. Juni toe dat eerst Training för de neei Saison toesaamenhaalt worden, freien. Bi de Groningers steiht ok 'n Emden in de Kader, dat is **Atilay Batbay**, de 2009 as A-Jögdspöler na Groningen haalt worden is. De freeit sük seker heel besünners up dat Spöl in Emden. Un noch 'n Spöler freit sük seker, dat is de Portugies **Carlos Santos**, de in de komende Jahr för Kickers Emden uplopen deit. He kunn in Portugal keen Arbeitsstee finnen un hett nu Unnerdack bi sien Unkel in Emden funnen.

Man nu toe eenige Jögdmannskuppen van Kickers Emden.

Well in de Neddersassenliga de **A-Jögdmannskupp** Meister word un dormit upstiggt, is noch neet klaar. De Tabellenföhrer Langenhagen verlor up egen Platz tegen de Heeseler SV mit 0:2. Dortegen wunnen de Jungs van Kickers Emden hör Spöl overlegen bi TuS Güldenstern Stade mit 5:0. Al in de eerst Halvtied laggen de Emders dör Toren van **Tido Steffens** und **Tido Tuitjer** mit 2:0 vörn. Torwart **Karsten Buss** kunn eenige groot Kansen van Stade dör goed Paraden ofwehren. In de 57. Menüte skoot **Lieven Treuke** dat dart Tor, un **Andreas Flesener** un Tido Steffens kunnen de Ball noch in 't Tor van Stade unnerbrengen.

Langenhagen kummt noch na Emden – un dorum kann Kickers ok noch ut egen Kraft Meister worden.

De **B-Jögdmannskupp** van Kickers Emden verlor in Braunschweig tegen SC Acosta mit 2:5. Na 'n Rügstand van 0:3 kwamm Kickers noch maal up 2:3, dör Toren van **Bertony Konda** und **Janek Grünebast**, ran. Kickers was drup un dran, de Utgliek toe sketen, man dann kwamm dat doch anners. Doran kunn ok Kickerstorwart **Marcel Wies**, he wohnt in Petjem in mien Nahberskupp, de heel goed hull, nix ännern.

In de Foetball-Landesliga de **C-Junioren** wunnen de Jungs van Kickers Emden tegen de VFL Osnabrück mit 4:2. Dat Spöl van Kickers Emden was neet goed, aber man hett wunnen. **Nils Frerichs** skoot dat eerst Tor för Kickers. Dat Tegentor full ut 'n klaar Ofsied. Man dar dürs neet lang un **Florian Harberts** kunn dat tweed Tor för Kickers sketen. **Lars Lauterbach** und **Julian Stöhr** skoten de beid anner Toren för Kickers Emden. **Alexander Bartels** was 'n heel goed Torwart.

So, nu toe Schluss noch, so as alltied, 'n kört Foetballwitz.

Unnerhollen sük twee Fans van 1. FC Köln: „Mien Hund kann Kunststücken. Elksmaal, wenn de FC 'n Tor kassert, maakt mien Hund 'n Salto.“

„Dat is ja neet toe löven. Vörwärts of Rückwärts?“. „Dat kummt drup an, wor ik hum treff.“

So, leev Toehörers van Radio Oostfreesland,

ik hoop, Joe hett dat Plattdütsk gefallen, denn mien Motto heet ja alltied, plattdütsk dürt nettso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.